

Pippi Socalunga: Las ultimas istorgias sin in disc cumpact dubel

■ (cp) Radio e Televisiun Rumantscha (RTR) e la Lia Rumantscha (LR) preschentan l'ultima part – in disc cumpact dubel (DCD) – cun las aventuras da Pippi Socalunga. Il giu auditiv cuntegna ils davos 5 chapitels da las aventuras da Pippi. E sco bonus è vegnida integrada la chanzun da Pippi en ina versiun da karaoke.

Suenter che RTR e LR han preschentan l'onn passà dus discs da las aventuras da Pippi cuntinua uss l'istorgia sin ils discs 3 e 4 cun «Pippi va a circus», «Pippi ed ils laders», «Pippi è envidada a café», «Pippi salva la vita a dus uffants» e «Pippi festivescha ses anniversari». Cun questas istorgias è vegnì realisà l'entir cudesch da «Pippi en la Villa Babilonia» sco project auditiv.

Il disc numer dus cuntegna – sper las aventuras – er anc la chanzun da Pippi en la versiun rumantscha. Per il disc dubel actual è uss anc vegnida registrada ina versiun da karaoke da questa chanzun. Cun il text, che sa chatta en il cudeschet dal disc, pon ils uffants uschia chantar la chanzun da Pippi cun accompagnament. La melodia inclusivamain il text rumantsch sa chattan sin il disc nov «Top Kids, vol. 7 ed 8, Pippi Socalunga».

Pippi Socalunga fascinescha gia dapi onns uffants sin l'entir mund. Ils films èn daventads classichers. Astrid Lindgren, ch'ha inventà la figura da Pippilotta Victualia Rollgardina Menta, figlia dal chapitani Efraim Socalunga è l'atura svedaisa da cudeschs d'uffants la pli conuschenta sin l'entir mund. Malgrà ch'ella ha entschet a scriver istorgias pir cun 37 onns, datti pli che 70 cudeschs dad ella e quai en almain era tants linguatgs.

Il disc dubel pon ins empustar tar Radio e Televisiun Rumantscha, tar la Lia Rumantscha a Cuira ubain retrair durant ils Dis da litteratura a Domat a la maisa da cudeschs.

Pretsch: 29.50 francs.

www.simsalabim.rtr.ch

www.liarumantscha.ch

Tgi che giavischa infurmaziuns regularas davart novas purschidas rumantschas per uffants trametta in e-mail a l'adressa:

simsalabim@rtr.ch

